



Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Oqaasiliortut peqatigalugit inatsisilerinermi kalaallisut oqaatsinik ineriartortitsinermik akuersinissamillu suliaqarnermik Naalakkersuisut salliutsitsinissaat pillugu Inatsisartuni aalajangiiffigisassatut siunnersuut. Taamattaaq Naalakkersuisut Oqaasiliortunik oqaloqateqarnermik kingorna UPA2019 sioqqullugu sulinissamut piffissamut pilersaarummik saqqummiussinissaannik peqquneqarput.

(Inuit Ataqatigiit Inatsisartuni ilaasortaatitai)

Tunggavilersuut:

Nunatsinni inatsisilerinikkut bachelor-ingorniarluni ilinniarnissamut periarfissaq pilersinneqaqqammivoq. Nunatsinnilu inatsisilerinikkut inerisaanermi Kalaallillu inatsisilerituunngortartut amerliartuaarnerini, oqaatsit inatsisilerinikkut atorneqartartut kalaallisut ineriartortinnissaasa pingaartinneqarnissaat tulluarsorivarput.

Oqaasiliortut pillugit Inatsisartut inatsisaat nr. 5, 1. juni 2017-meersoq naapertorlugu inatsisilerinermi oqaatsit kalaallisut atorneqartut akuerinissaannut suliassaq oqaasiliortuniippoq – Oqaasiliortut suliamut tassunga atatillugu ilisimasaqartut attuumassuteqartut, oqaatsinik atorneqartunik Oqaasiliortunut innersuussisartut akuliutsittassa vaat.

Oqaatsit atorneqartut ineriartortinnerat ukiunik arlalinnik sivissuseqassanganneqarpoq. Oqaatsit inatsisilerinikkut atorneqartut kalaallisuunngorlugit ineriartortinnissaat akuerineqarnissaallu pillugit qanoq sivistigisumik sulinissamik naliliinissap ilisimasalinnit nalilerneqarpat pitsaanerussasoq isumaqarpugut. Taamaattoq politikikkut tapersersuinissaq, tassungalu atatillugu aamma isumalluutunik atugassanngortitsinissaq aamma pingaaruteqartutut isigaarput.

Ilisimaaraarpulli inatsisilerinermi oqaatsit nunani tamani atorneqartartut arlaqarmata aalajangersimasumik isumallit, ilaatigut latin-erisut sumiluunniit nunami atorneqartartut. Taamaakkaluortoq aamma nunani assigiinngitsuni assigiinngitsunik isumaqartinneqarsinnaasarput. Taamaammatt aamma pingaaruteqarpoq peqqissaarussamik sulinermi aalajangersuinissaq oqaatsit sorliit kalaallisuunngortissallugit isumaqarnerpaassanersut tulluarnepaassanersullu.

Assersuutigalugu qallunaat danskisut ordbogilornikuupput inatsisitigut oqaatsinik nassuiaammik. Taannalu dansk-juridisk ordbogi oqaatsinik nassuiaatsiniillu 1.000-nik imaqarpoq.

INUIT ATAQATIGIIT

Inatsisartuni



Oqaatsivut ineriartortuarput. Eqaatsuummatali tulluarnissaannik aamma inissaqartitsilluarput. Namminiilivikkiartornitsinnilu, nammineerlutalu isumagisinnaasa vut akisussaaffivullu annertusiartuaartillugit alloriarfissatta tullinnguuttut ilagaat inatsisilerinikkut oqaatsitta tulluarnissaat.

Nunatsinnilu siunertaraarput atorfissaqartitsinerput naapertorlugu sapinngisamik nunatsinni inatsisilerituut amerlanerpaat kalaallisut oqalussinnaasut, kalaallisullu sullissisinnaasut.

Pisortanut aningaasatigut allaffissornikkullu kingunerisassai:

Suliassamik pingaarnersiuneq namminermini Naalakkersuisut Oqaasiliortunut suliakkiissutaasa iluanneereerpoq. Inatsisilerinikkut kalaallisut oqaatsinik ineriartortitsineq akuerinninnissallu pinissaat pillugu piffissamik pilersaarusionerq, immikkut ilisimasalinnik sorlernik akuliutsitsinissaq akuliutsitsinerullu taassuma qanoq siviutiginissaanik naliiinissaq apeqqutaassaaq. Piffissamut pilersaarummik suliqaarneq AC-p ukiup sisamararterutaanik sulinissaatut naleqartussatut ilimagineqarpoq, tassa 125.000 kr-it, tassani naalakkersuisoqarfinnit Oqaasileriffimmillu isumalluutinik atunerit ilanngullugit.

Namminersortunut aningaasaatigut allaffissornikkullu kingunerisassai:

Soqanngilaq

Innuttaasunut aningaasatigut allaffissornikkullu kingunerisassai:

Soqanngilaq